


Matthias Kröner

Dahamm und Anderswo

Gedichte



ars vivendi

ars vivendi[ⓧ]

Matthias Kröner
Dahamm und Anderswo

Gedichte

ars vivendi

Für Emil · Für Lennard

Originalausgabe

1. Auflage November 2016

© 2016 by ars vivendi verlag GmbH & Co. KG, Bauhof 1,
90556 Cadolzburg
Alle Rechte vorbehalten
www.arsvivendi.com

Umschlaggestaltung: ars vivendi,
nach einem Bild von Toni Burghart

© Nachlass Erben Toni Burghart

Typografie und Ausstattung: ars vivendi verlag

Druck: BookPress

Printed in the EU

ISBN 978-3-86913-740-7

Inhalt

1 Dahamm

Briefdräächer	10
Schdromleidunger	11
Wos mir wissn	12
Abwasch	13
Schdorch	14
Alde Schbrooch	15
Mei Haimood (odder: Zwaa vo Achzg)	16
Wechgeh, hiegeh	18
Des alde Zaich	19
Regionool	20
Änn Haafm Ärberd	21
Aff ä Bfüdzn in Oberasbach	22
Regionoolkrimis	24
Sibirischer Waldluchs (odder: Dä BR in Bayern)	25

2 Aff dä Fluchd

Aff dä Fluchd	28
Hunderdzwaa	29
Revolde	30
Aussichdslos	31
Ausschbrooch	32
Di Laid und iich	33
Dä Schdood und iich	34
Haimoodverbundn	35
Offne Gsellschafd	36
Haimoodfluchd	37
Rock'n'Roll	38

3 Affm Weech

Kennsd di aus?	40
Drümmerfraa	41
Kosmobolid	42
Zuuchvögl	43
Schwarzbrood	44
Wann gemmern hamm?	
(odder: Dä Chrisdkindlersmarkd ass Kindersichd)	45
Eldern (odder: Äs Drama vo derer Weld)	46
Schdaaner	47
Auswärts	48

4 Weid wech

Oh, wie schön is Banama	50
Beziehungsprobleme	51
Erziehung	52
Aff Aunghöhe	
(odder: Ä Schrifdschdeller zu saaner Fraa)	53
High Noon	
(odder: Nooch anner Kundgebung in Clausnidz)	54
Dä Mooßschdoob	
(odder: Ä Kridiger denkd, wosser werkli sachd)	55
Zeidzeuge	56
Oomdroom	57
Vo Schbyll zu Schbyll	58
Bläymobil	
(odder: Ä Zwedschgermännlä werd debbressiv)	59
Indegrazion	60

5 Aff verlurner Bosdn

An ämm Ord, woosd ned sei wyllsd	62
Im Exil	63
Im Exil, Deil zwaa	64
Klassndreffm	65
Drei Froong	66
Ned blooß bamm Fußball	67
Skylein	68
Blödзли rechds	69
Sei leis! (odder: Nämbercher Drichder)	70
Nä blooß ned änn Greuther-Dee	71
Rechde Seidn	72
Realisd	73
Wos edz? (odder: Ä Dordnbladdn denk d nooch)	74
Groobschdaa	75
Kochdöbf	76
Ä Generadzionerkonflikd	77

6 Nuned doo

Alde Klamoddn	80
Indegrazion, Deil zwaa	81
Zen	82
Udobie	83
Ka Kerwäliedlä	84
Ass Kinder wern Laid	85
Midlife-Crisis	86
Akzienmarkd	87
Heizung	88

7 Anderswo

Ookummer	90
Dahamm und Anderswo	91
Babier	92
Flüchdling	93
Schdimmer	94
Riduale (odder: Ende der Romandik)	96
Hammkummer (odder: Ä Melodie in Fis)	97
Willkommenskuldur	98
Willkommenskuldur, Deil zwaa	99
Haimoodlos	100
Chamäleon	101
Zwaausendsechs (odder: Vurm Halbfinoole vo dä EM 2016 bamm Babblig Viuing)	102
Sankdnimmerleinsdooch (odder: Zwaa Wochn nooch dä EM)	104
Liebesgedichd	105
Noochkriechslyrik	106
Subber Nachbärn	107
Frankn lichd hald am Meer	108
Werschoffhuuf	110
Zur Schbrooch (odder: Ä Kabiddl in Konsequenz) –	
Anmerkung des Autors	112
Nachwort von Elmar Tannert	115
Danksagung	118

1 Dahamm

Briefdräacher

Edz binn i dahamm.
Edz hobb i ä Medzgeri, die mi grüßd,
ä Bäggeri,
die mied mir übers Wedder redd
und änn Briefdräacher,
demm i am Heilichn Oomd ä Drinkgeld gibb.

Wenn i hamm foahr, in mei alde Haimood,
kennd di Medzgeri ned mein Noomer,
wass di Bäggeri nämmer, wer vur ihr schdehd,
und dä Briefdräacher
is wechradzionalisiert woarn.

Woar vylleischd guud,
dass i wech binn – vo derer Gehend.

Schdromleidunger

Dahamm,
doo schbrechn sugoar di Schdaaner,
di Bäum schdeggn dä ihre Sehnsüchd zu,
ä Weiher werd zu ämm ganzn See,
und di Schdromleidunger singer,
wennsd durchläffsd
under ihner.

Dahamm,
doo gibbds änn, der dä zuhorchd,
an dems di abärberdsd,
doo kennsd änn Wind
und doo wassd, wann dä Reeng kummd.

Dahamm,
doo kennsd Godd und di Weld
und desweeng bisd wech,
hie zu andere Schdromleidunger und Schdaaner,
hie zu ämm See,
der ä riesichs Meer is,
hie zu ämm Reeng und ämm Wind,
der ned wass, wersd bisd.

Edz bisd ford.
Edz kennd di kanner mehr.
Edz bisd mied deem Gfredd allaans.

Edz gehd di Ärberd loos.

Wos mir wissn

Kanner wass,
wosser werkli wyll.
Des is äs Broblem vo uns
Menschn.

Jeeder wass,
wosser goar ned mooch.
Des is äs Broblem vo uns
Frankn.

Abwasch

»Andreedn!« hodds ghaaßn,
wenn i miedhelfm hobb solln bamm Abwasch.
Wenn i ned glei äs Gschirrduch gnummer hobb,
hodd mei Mudder »Bewaffne diich!« gsachd.
Und wemmer ferdi woarn: »Edz bisd befreid!«

Wenn i haid, selber Baba,
mied maane zwaa Buum in dä Früh frühschdügg,
und mir sinn widder amol arch schbääd droo,
sooch i »Edz obber zagg-zagg!«
und »Abmarsch!«.

Wie, frooch i di,
wyll mä friedli sei,
wenn si dä Kriech neigschlichn hodd
in di Schbrooch?

Schdorch

Wenn i die scho siech,
wies schdolzierd,
wies endlangschreided,
wies vurbeiläffd
an unserm Küchnfensder,
wenn i äs Essn koch für mein Moo.

Die hodd Zeid.
Die gehd langsam, schee langsam.
Die schdolzierd wie ä Schdorch.
Die hodd ka Gejooch.
Die sedzd änn Fuß vurn andern.
Die wass ned, wos des hassd, wenss bressierd.

Die wass blooß, dass widder amol frei hodd,
di Fraa Oberschdudienräädin.

Alde Schbrooch

Fränkisch schbrechn is wie fränkisch essn,
obber ka Schäuferlä und erschd rechd
ka Broodwörschd,
eher wos Bsonders,
wos blooß manchmool ba maaner Oma geem hodd –
und in ämm aanzichn Lokal
in dä Fränkischn,
des di Kahlfresser längsd scho
wechbudzd hamm.

Mei Haimood (odder: Zwaab vo Achz)

Doo schdenners:

Achz Laid ass ämm Dorf in Frankn.

Verzg denner si ned groß ab.

Die sinn, wies sinn.

Die scheern si ned vyll um andere.

Manchmool drenner sä si.

Di Haimood bedaid denner nix.

Zwanzg schdelln Bedongklödz hie

und denner, wos denner müssn.

Wall wennis nix denner, griengs gsachd, werd aa nix.

Desweeng denners und denners

und hamm ka Zeid.

Di Haimood is denner worschd.

Zehn wolln wos erreihng.

Die sinn agdiv in dä Kerch,

im Kindergardn,

im Aldersheim,

in dä Bolidik.

Alles ohne änn Cend, dens sehng.

Denner ihr Haimood is ganz woanders.

Fümbf gibbds bloß nu aafm Babier.

Die schdenner nu drin in di aldn Underloong,

im Geburdsregisder und im Kadasderamd.

Obber die leem längsd in dä großn Schdadd.

Die sinn vo dä Haimood davoo.

Drei gibbds,
die wolln widder änn,
vo demms schbääder soong könner:
Alles woar ned su schlechd.
Der hodd aa saane guudn Seidn ghabbd.
Die hamm ihr Haimood verroodn.

Und dann sinn in demm Dorf nu zwaa Flüchdling:
Maansd werkli, die versaun uns

äs Leem?

Wechgeh, hiegeh

Wennd di
wo dahamm fühlst,
geh ford, geh ford.
Bloß dann kummsd
aa werkli weider.

Wennd di
wo dahamm fühlst,
bleib dord, bleib dord.
Bloß dann kummsd
aa werkli weider.

Des alde Zaich

Wennd mied ämm lang gnuch zamm bisd,
därffsd dä immer des alde Gschmarri vo demm oohörn.
Derbei hosd du aa ä Gschmarri,
des dodaal wichdich is.
Dei Gschmarri gecher des Gschmarri vo demm.
Zwaa Gschmarri,
die ghörd wern wolln,
zwaa Gschmarri,
mied denner mä si abdudd,
die mä ned loosbringd, die immer doo sinn.
Doo brauchsd eingli ned nu di ander Woor:
änn Dschob, Kinder, Krankheidn, äs Leem.
Doo häddsd scho gnuch zu duu mied deim Gschmarri
und demm Gschmarri vom andern.
Doo wär äs Leem aa ausgefülld,
doo häddsd aa ä Selbsdverwerklichung,
die dä su wichdich is,
obber vylleichd is guud, dass immer nu andere Sachn gibbd
wie des alde Zaich.
Doo werds ned su wichdich,
dei Gschmarri,
doo fällds ned aaf,
dass mei Gschmarri hald scho aweng wichdicher is
wie des alde Zaich
vo dir.

Chamäleon

Schee langsam und vorsichdich,
aa wennsd di nu su schdräubsd,
wersd ä anderer,
allaans,
wallsd woanders bisd.
Doo konnsd nix machn.
Di Gehend ziehd an dir
und du ziechsd an der Gehend.
Manchmool hinderlässd änn Dubfer.
Obber massdns bisd du der,
der naie Dubfer grichd.
Fleggn, lauder Farbfleggn,
die edz zu dir ghörn.



ars vivendi 

ISBN 978-3-86913-740-7



9 783869 137407

€ 15,90 (D)
€ 15,90 (A)

www.arsvivendi.com